

- उपमुख्यमंत्री अर वित्त मंत्री दिया कुमारी विकसित राजस्थान 2047 रा संकल्प माथे केन्द्रित बजट पेश कीनो।
- बजट मांय नुवी जल नीति, आईटी पॉलिसी अर ड्रोन पॉलिसी लावण रो ऐलाण।
- मुख्यमंत्री भजन लाल शर्मा कह्यो-लारली सरकार री तुलना मांय गत दो साल मांय पूंजीगत खर्च करीब दुगुणो बधायी ज्यो।
- राजस्थान माध्यमिक शिक्षा बोर्ड कानी ऊँ लिया जावण वाळा इम्तिहान काल सरू व्हेला।

000

राज्य रा माली साल 2026-27 रा बजट मांय बुनियादी ढांचा रा विकास बाबत् 3 हजार 427 करोड़ रुप्या रा पूंजीगत खर्च रो प्रस्ताव करी ज्यो है। उपमुख्यमंत्री अर वित्त मंत्री दिया कुमारी आज विधानसभा मांय बजट पेश करता थकां आ जाणकारी दीनी। बजट भाषण मांय वे कह्यो के लारली सरकार री तुलना मांय प्रदेश री माली व्यवस्था रो आकार बधयो है।

000

बजट मांय खेती-बाड़ी अर किसानां रा भला सारू एक लाख 19 हजार 408 करोड़ रुप्या रो प्रावधान करी ज्यो है। उपमुख्यमंत्री दिया कुमारी कह्यो के आ रकम राज्य रा सकल घरेलू उत्पाद रो 5 दशमलव पांच-पांच फीसदी है। दिया कुमारी कह्यो के 35 लाख किसानां ने खेती-बाड़ी सारू 25 हजार करोड़ रुप्या रा बिना ब्याज रा कर्ज दिया जावेला। यमुना नदी रा पाणी रा बारा मांय करी ज्यो करार रो जिक करता थकां वित्त मंत्री कह्यो के राज्य रा शेखावाटी हलका मांय पाणी पूगावण सारू 32 हजार करोड़ रुप्या रा खर्च वाळी परियोजना ऊँ जुड़्या काम बेगा ई सरू व्हेला। किसानां ने आवता साल 50 हजार सोलर पंप अर तारबंदी सारू 50 हजार किसानां ने 288 करोड़ रुप्या री सब्सिडी दी जावेला।

महिलावां ने माली तौर ऊँ खुद रे पाण ऊबी करण बाबत् दिया कुमारी मुख्यमंत्री नारी शक्ति उद्यम प्रोत्साहन योजना रा तैत महिला स्वयं सहायता समूहां ने दिया जावण वाळा कर्ज री हद 50 लाख ऊँ बधा र एक करोड़ रुप्या करण रो ऐलाण कीनो। बजट भाषण मांय उपमुख्यमंत्री कह्यो के मुख्यमंत्री लखपति दीदी योजना रा तैत कर्ज री सीमा ई बधा र डोढ़ लाख रुप्या कर दीरीजी है। वे कह्यो के गांवाई हलकां मांय महिलावां ने काम-धंधो मुहैया करावण सारू 100 करोड़ रुप्या रा खर्च ऊँ रुरल वूमेन बीपीओ केंद्र खोल्या जावेला अर महिला कर्मचारियां सारू दफतरां मांय मुख्यमंत्री शिशु-वात्सल्य सदन बणाया जावेला।

राज्य रा कर्मचारियां अर पेंशन लेवण वाळां रा भला रो जिक करता थकां दिया कुमारी कह्यो के 8 वां वेतन आयोग री सिफारिशां रा बारा मांय आला दर्जा री समिति बणायी जावेला। दिया कुमारी कह्यो के 70 साल उम्र ताई रा बुजुर्गा अर कर्मचारियां सारू खास सैलेरी अकाउंट पैकेज लायो जावेला, जिण रा तैत सस्ता कर्ज अर बीमा रो सुबीतो मुहैया कर्यो जावेला।

प्रशासनिक सुधारां री चर्चा करता थकां वित्त मंत्री बजट भाषण मांय कह्यो के उपनिवेशन विभाग ने राजस्व विभाग मांय भेळो कर दियो जावेला। वे 8 नुवा जिलां मांय सरकारी दफतर बणावण सारू ई रकम देवण रो प्रस्ताव कीनो।

बजट मांय मुख्यमंत्री स्वरोजगार योजना रा तैत 30 हजार नौजवानां ने बिना ब्याज रा कर्ज देवण रो प्रस्ताव करी ज्यो। दिया कुमारी जलदाय विभाग अर कृषि विश्वविद्यालयां मांय न्यारा-न्यारा ओहदा माथे नुवी भर्तियां रो ऐलाण ई कीनो।

000

उपमुख्यमंत्री बजट मांय पहली ऊँ 8 वीं कक्षा ताई रा 40 लाख विद्यार्थियां ने स्कूल ड्रेस मुफ्त देवण सारू 250 करोड़ रुप्या रो प्रावधान कीनो। वे कह्यो के होशियार विद्यार्थियां ने लेपटॉप देवण सारू ई-वाउचर दिया जावेला अर भर्ती परीक्षावां मांय साफगोई लावण सारू 'राजस्थान स्टेट टेस्टिंग एजेंसी' बणायी जावेला।

बजट मांय राज्य रा बुनियादी ढांचा रा विकास रा तैत नुवा पुल अर सड़कां बणावण बाबत् एक हजार आठ सौ करोड़ रुप्या रो प्रावधान करी ज्यो। वित्त मंत्री सगळा संभाग मुख्यालयां माथे ट्रेफिक री लाल हरी लाईटां खत्म करण सारू फलाईओवर अर अंडरपास बणावण रा काम बाबत् ई 2 हजार तीन सौ करोड़ रुप्यां रो प्रावधान कीनो। इण मांय जयपुर सारू एक हजार करोड़ रुप्या रो प्रावधान है। उपमुख्यमंत्री कह्यो के हाई-वे माथे हादसा रोकण माथे नुवी तकनीक वाळा कैमरा लगाया जावेला।

000

बजट भाषण मांय अमृत 2.0 योजना रा तैत आवता साल 3 लाख नुवा कनेक्शन देवण रो ऐलाण करी ज्यो। बीकानेर रा देशनोक मांय 24 ई घंटा पाणी मुहैया करावण रा काम माथे साढे सात सौ करोड़ रुप्या खर्च करण रो ऐलाण ई बजट मांय करी ज्यो।

उपमुख्यमंत्री साइबर अपराधां माथे लगाम लगावण सारू राजस्थान साइबर क्राइम कंट्रोल सेंटर बणावण रो प्रस्ताव कीनो। शहरां मांय जनता री हिफाजत सारू 5 हजार होम गार्ड्स बधाया जावेला। लाय लागण रे कारण व्हेवण वाळां हादसा रोकण सारू 40 करोड़ रुप्या रा खर्च ऊँ 93 फायर बाइक री खरीदी रो ऐलाण ई बजट मांय करी ज्यो। भ्रष्टाचार ने रोकण रा मकसद ऊँ भ्रष्टाचार निरोधक ब्यूरो रो फंड बधा र 7 करोड़ रुप्या करण रो प्रस्ताव ई बजट मांय करी ज्यो।

उपमुख्यमंत्री कह्यो के जयपुर रा जेके लॉन अस्पताल मांय 75 करोड़ रुप्या रा खर्चा ऊँ 500 बिस्तरां वाळो नुवो आईपीडी टावर बणायो जावेला। वे मोटा शहरां रा अस्पतालां मांय भर्ती मरीजां रा पिरवार वाळां रा ठहराव सारू 500 करोड़ रुप्या रा खर्च ऊँ विश्राम घर बणावण रो प्रस्ताव ई बजट मांय कीनो। ई सागे ई अस्पताल मांय मौत व्हे जावण पाछे पार्थिव देह ने घर ताई मुफ्त पूगावण सारू मोक्षवाहिनी योजना सरू करण रो ऐलाण ई बजट मांय करी ज्यो।

उपमुख्यमंत्री सीकर, झुंझुनूं, डीग अर भरतपुर मांय हवाई अड्डा बणावण सारू फिजिबिलिटी सर्वे रो ऐलाण कीनो। वे जैसलमेर जिला रा खुहड़ी मांय अल्ट्रा लर्जरी पर्यटन ज़ोन अर कुलधरा मांय पर्यटन केंद्र बणावण रो प्रस्ताव ई कीनो। धार्मिक पर्यटन रो जिक्र करता थकां वे कह्यो के वरिष्ठ नागरिक तीर्थ यात्रा योजना रा तैत 50 हजार बुजुर्गां ने वातानुकूलित रेलगाडियां रे जरिये तीरथ करायो जावेला। दिया कुमारी जोधपुर मांय शहीद मेजर शैतान सिंह कौशल विकास केंद्र अर झुंझुनूं मांय वॉर म्यूजियम खोलण रो ऐलाण ई कीनो।

वित्त मंत्री कह्यो के सरकार नुवी जल नीति, आई.टी. पॉलिसी अर ड्रोन पॉलिसी लावेला। बजट मांय आवता साल राज्य मांय 10 करोड़ पौधा रोपण रो ई प्रस्ताव करी ज्यो। दिया कुमारी बीकानेर अर जैसलमेर मांय 2 हजार 950 करोड़ रुप्या रा खर्च ऊँ नुवा सोलर पार्क बणावण रो प्रस्ताव ई कीनो। कर सुधारां रो जिक्र करता थकां वित्त मंत्री कर्ज रा

कागजात माथे पंजीयन शुल्क एक फीसदी ऊँ घटा र आधा फीसदी करण रो प्रस्ताव ई कीनो ।

000

बजट पाछे मुख्यमंत्री भजन लाल शर्मा कह्यो के प्रदेश ने साल 2047 ताई विकसित बणावण रा संकल्प ने ध्यान राखता थकां बजट पेश करी ज्यो है । वे कह्यो के साल 2024-25 रा बजट रा करीब 93 फीसदी काम जद के लारला साल रा बजट मांय करी ज्या ऐलाण मांय ऊँ करीब 86 फीसदी माथे काम पूरा व्हे गया है । वे कह्यो के ई दफा बजट रो आकार 6 लाख 10 हजार करोड़ रूप्या ऊँ बत्तो है ज्यो कांग्रेस रा राज री बगत रा आखिरी बजट ऊँ 41 फीसदी बत्तो है । वे कह्यो के कांग्रेस रा राज री तुलना मांय वां रा राज रा लारला दो साल मांय पूंजीगत खर्चो घणो बधायी ज्यो है । श्री शर्मा कह्यो के बजट मांय नौजवानां, किसानां अर महिलावां सारु केई ऐलाण करी ज्या ।

000

केन्द्रीय संस्कृति अर पर्यटन मंत्री गजेन्द्र सिंह शेखावत राज्य रा ई बजट ने विकसित भारत बणावण री सोच मांय प्रदेश री मजबूत भागीदारी ने आगे बधावण वाळो आगे री सोच रो रोड़मैप बतायो । वे कह्यो कला-संस्कृति, सैर-सपाटा, महिला अर बाल विकास, भणार्ई-लिखाई अर पाणी मुहैया करावण माथे खास ध्यान सरकार री सगळा रा विकास री सोच ने बतावे है । राज्य वित्त आयोग रा अध्यक्ष अरुण चतुर्वेदी ई बजट ने सगळां रो भलो करण वाळो बतायो ।

दूजी कानी विधानसभा मांय विपख रा नेता टीकाराम जूली बजट ने बेबुनियाद बताता थकां कह्यो के बजट मांय करी ज्या केई ऐलाण ऊँ जुड्या कोई माली प्रावधान नी करी ज्यो है ।

000

कारोबार अर उद्योग जगत ई बजट रो स्वागत कीनो है । फैंडरेशन ऑफ राजस्थान ट्रेड एंड इंडस्ट्री-फोर्टी रा अध्यक्ष सुरेश अग्रवाल बजट ने प्रदेश री माली तरक्की ने तेज करण वाळो बतायो । वे कह्यो के बजट मांय करी ज्या ऐलाण ऊँ उद्योगां ने बधावो मिलेला जिण ऊँ राज्य रा विकास ने रफतार मिलेला ।

000

राजस्थान माध्यमिक शिक्षा बोर्ड कानी ऊँ लिया जावण वाळा इम्तिहान काल सरु व्हेला । ई साल बोर्ड रो इम्तिहान देवण सारु 19 लाख 90 हजार ऊँ बत्ता विद्यार्थी नाम मण्डाया है । इम्तिहान सारु प्रदेश मांय 6 हजार 194 सेन्टर बणायी ज्या है । बोर्ड बिना नकल साफगोई सागे परीक्षा तैय करण सारु जिलां मांय अभय कमांड सेंटर्स रे जरिये परीक्षा केन्द्रां री निगराणी री व्यवस्था कीनी है । मुख्यमंत्री भजन लाल शर्मा बोर्ड परीक्षा देवण वाळा विद्यार्थियां ने शुभकामना दीनी है ।

000